

Forslag til forskrift om vern av Taravika naturreservat, Karmøy kommune, Rogaland

Fastsett ved kongeleg resolusjon [dato] med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34 og § 62. Fremja av Klima- og miljødepartementet.

§ 1 Føremål

Føremålet med Taravika naturreservat er å ta vare på områder som:

- a. representerer en bestemt type natur i form av stein- og sandstrand med stor og stabil tangvoll
- b. inneheld truga, sjeldsyn, eller sårbar natur i form av truga fugleartar knytt til tangvoll som næringssøkeområde
- c. har særleg betydning for biologisk mangfald ved å huse eit rikt og variert fugleliv, mellom anna som leveområde for ande-, sjø- og vade-fugl.
- d. har særskilt naturvitskapeleg tyding da det er store mengder sjø- og vadefugl og utgjer vesentleg kvile- og næringssøkeområde heile året, med fast telle punkt for bestandobservasjonar.

Det er ei målsetting å ta vare på verneverdiane i mest mogleg urørd tilstand, og eventuelt vidareutvikle dei.

§ 2 Geografisk avgrensing

Taravika naturreservat omfattar følgande gnr./bnr.: Rogaland, Karmøy kommune: 25/7, 25/14, 25/16, 25/17, 25/28 og 25/29.

Taravika naturreservat dekker eit totalareal på 52 daa. Grensene for naturreservatet går fram av kart datert Klima- og miljødepartementet [dato]. Dei nøyaktige grensene for naturreservatet skal merkast av i marka. Knekkpunkta skal koordinatfestast.

§ 3 Vernereglar

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a. Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp medrekna lav eller deler av desse frå naturreservatet. Planting eller såing av tre og annan vegetasjon er forbode. Fjerning av tang og tare, inklusiv taretråling, er forbode.
- b. Dyrelivet, medrekna reirplassar og hiområde, er verna mot skade, øydelegging og unødig forstyrring, dette inkluderer også jakt og fangst. Utsetting av dyr er forbode.
- c. Det må ikkje settast i verk tiltak som kan endre naturmiljøet, som til dømes oppføring av bygningar, anlegg, gjerde og andre varige eller mellombelse innretningar, parkering av campingvogner, brakker e.l., framføring av luftleidningar, jordkabler, kloakkleidningar, bygging av vegar, drenering eller anna form for tørrlegging, uttak, oppfylling og lagring av masse, utføring av kloakk eller anna form for forureining,

etterlating av avfall, gjødsling, kalking eller bruk av kjemiske utryddingsmiddel.

Forsøpling er forbode. Opplistinga er ikkje uttømmande.

- d. Ytre utforming på faste kulturminne, slik som automatisk freda kulturminne, båtnaust, båtstøer, kvernhus, forsvarsanlegg, fyranlegg, ferdselsveggar, steingardar o.l., må ikkje endrast, skadast eller fjernast. Opplistinga er ikkje uttømmande.
- e. Camping og telting er forbode i sanddyneområda markert i vernekartet.
- f. Ballspel og anna erosjonsskapande aktivitet er forbode i sanddynene, med unntak av vegetasjonslaus forstrand.
- g. Bruk av naturreservatet til større arrangement er forbode.
- h. Hund skal haldast i band og bandlengde må ikkje overstige 5 meter.

§ 4 Generelle unntak frå vernereglane

Vernereglane i § 3 er ikkje til hinder for:

- a. Jordbruksdrift med dei metodar som er vanleg elles i distriktet for fulldyrka, overflatedyrka mark eller eksisterande innmarksbeite, mellom anna oppsett og fjerning av midlertidig trådgjerde, bruk av kjemiske plantevernmiddel, kalking, tilleggsfôring, bruk av gjetarhund, så fremt det ikkje påverkar verneverdiane eller verneføremålet. Opplistinga er ikkje uttømmande.
- b. Beite, men ikkje med grisehald, på sanddynemark, strandeng, semi-naturleg strandeng, kystlynghei og strandberg, nakent berg og våtmark i utmark som markert i vernekartet.
- c. Gjødsling på overflatedyrka og fulldyrka mark eller innmarksbeite godkjent av kommunen som spreieareal for husdyrgjødsel på vernetidspunktet, markert i vernkart.
- d. Innføring av nye planteartar til fulldyrka mark, som ved spreiding ikkje vil redusere landskapets verdi.
- e. Ny grøfting på fulldyrka areal.
- f. Vedlikehald av eksisterande grøfter, kanalar, dreneringsrør og veiter.
- g. Vedlikehald av eksisterande bygningar, vegar/traktorveggar, stiar og andre anlegg og innretningar i samsvar med standard på vernetidspunktet.
- h. Mindre uttak av tang og tare, på land og i fjørebeltet, for grunneigar og innehavar av tinglyst rett i tidsperioden 15.05 til 15.08, til eige gards bruk.
- i. Opplag av båt for grunneigar og innehavar av tinglyst rett.
- j. Drift og vedlikehald, samt naudsynt istandsetjing ved akutt utfall knytt til eksisterande energi- og kraftanlegg, vann- og avløpsnett, fyrlykt og FV547 og FV4844 i og inntil verneområdet.
- k. Hund utan band i operativ militær-, politi- eller redningsverksemd.
- l. Fangst av mink

§ 5 Regulering av ferdsel

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a. Motorisert ferdsel på land er forbode, medrekna landing og start med luftfartøy og flyging under 300 moh. Forbodet omfattar også modellbil, modellfly, dronar og liknande.
- b. Motorisert ferdsel, inklusiv modellbåt og dronar, på og i sjø må ikkje overstige 5 knops fart.
- c. Sykling er forbode i sanddyneområde med unntak av opparbeida sti-nettverk.

- d. Riding og bruk av hest er forbode på alle strandområda utanom på sti og vegetasjonslaus forstrand.
- e. Bruk av vasskuter, padling, roing, kiting, vindsurfing, surfing og liknande vassportsaktivitar, er forbode i perioden 01. august til 31.mai.

§ 6 Generelle unntak frå ferdselsreglane

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings-, oljevern- og oppsynsverksemd, samt gjennomføring av skjøtsels- og forvaltningsoppgåver som er bestemt av forvaltningsstyresmakta. Unnataket gjeld ikkje øvingsverksemd.

Ferdselsreglane i § 5 avsnitt er ikkje til hinder for:

- a. Naudsynt motorferdsel i samband med landbruksdrift på fulldyrka mark, overflatedyrkamark og innmarksbeite, og på landbruksvegar markert i vernekartet. Unnataket gjeld ikkje for sanddyneområde.
- b. Naudsynt motorisert ferdsel i utmark for å hente ut skada, sjuke eller daude husdyr.
- c. Naudsynt motorferdsel til istandsetting ved akutt utfall eller fare for akutt utfall på eksisterande energi- og kraftanlegg, vann- og avløpsnett og fyrlykt, jf. § 4 bokstav j. Slik bruk av motorisert transport skal i etterkant meldast til forvaltningsmynde.
- d. Ferdsel med båt til og frå båtøpptrekk for grunneigarar og dei med tinglyst rett til båt plass innafor naturreservata på vernetidspunkt, jf. § 5 andre avsnitt bokstav e.

§ 7 Spesifiserte dispensasjonsreglar

Forvaltningsstyresmakta kan etter søknad gi dispensasjon til:

- a. Istandsetting, vedlikehald og skjøtsel av kulturminne.
- b. Gjødsling av anna areal enn sanddynemark, strandeng, semi-naturleg strandeng, naturbeitemark, kystlynghei og strandberg, nakent berg og våtmark i utmark, som markert i vernekartet. Gjødsling må ikkje påverke knausar, nakent berg og fjell i dagen, også på innmarksbeite. Det må føreligge godkjent gjødslingsplan.
- c. Oppsetting av nye gjerder.
- d. Merking og rydding av nye stiar.
- e. Avgrensa bruk av naturreservatet for større arrangement nemnt i § 3 første avsnitt bokstav g.
- f. Hogst av etablerte plantefelt, ringbarking, hogst og uttak av gran og utanlandske treslag; forynging med stadeigne treslag.
- g. Rydding eller flytting av tang og tare på land og i fjørebeltet.
- h. Mindre uttak av sand for grunneigarar og innehavar av tinglyst rett til eige gards bruk.
- i. Oppgradering og fornying av energi- og kraftanlegg, vann- og avløpsnett, fyrlykt og FV547 og FV4844 som ikkje fell inn under § 4 bokstav j.
- j. Øvingskøyning for føremål nemnt i § 6 første avsnitt.
- k. Naudsynt motorferdsel i samband med vedlikehald av grøfter, kanalar, dreneringsrør og veiter for landbruksverksemd på areal utanom unntak frå forbod, jf. § 6 andre avsnitt bokstav a.
- l. Naudsynt motorferdsel i sanddyneområde i samband med landbruksdrift, og uttak av sand og tare.

- m. Naudsynt motorferdsel i samband med drift og vedlikehald, samt oppgradering og fornying av eksisterande energi- og kraftanlegg, vann- og avløpsnett og fyrlykt, jf. § 4 bokstav j og § 7 bokstav i.
- n. Naudsynt motorferdsel i samband med aktivitetar etter § 4 bokstav f, g, h og i og § 7 bokstav a, c, d, e, f og g.

§ 8 Generelle dispensasjonsreglar

Forvaltningsstyresmakta kan gjere unntak frå forskrifta dersom det ikkje strir mot føremålet med vernet og ikkje kan påverke verneverdiane nemneverdig, eller dersom omsyn til tryggleik eller omsynet til vesentlege samfunnsinteresser gjer det nødvendig, jf. naturmangfaldlova § 48.

§ 9 Skjøtsel

Forvaltningsstyresmakta, eller den forvaltningsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstand som er føremålet med vernet, jf. naturmangfaldlova § 47.

§ 10 Forvaltningsplan

Det [*kan*] utarbeidast forvaltningsplan med nærare retningslinjer for forvaltning av naturreservatet. Forvaltningsplanen kan innehalde nærare retningslinjer for gjennomføring av skjøtsel.

§ 11 Forvaltningsstyresmakt

Karmøy kommune er forvaltningsstyresmakt etter denne forskrifta.

§ 12 Ikraftsetjing

Denne forskrifta trer i kraft straks.